



# **Regulativ per il survetsch dentari da scola**

## **Revisiun totala**

### **M E S S A D I**

dalla suprastanza communal a il cussegl da vischnaunca

Preziada signura presidenta  
Preziadas signuras cusseglieras  
Preziai signurs cussegliers

A caschun dalla tractaziun dil preventiv 2012 ha il cussegl da vischnaunca supplicau la suprastanza communal da reponderar il sistem dil survetsch dentari. Dil sistem actual da calcular la contribuziun communal profitschien numnadamein buca mo ils geniturs, mobein era las cassas da malsauns.

## Sitaziun actuala

La tgira da dents dils affons vegn reglada en l'ordinaziun cantunala davart la tgira da dents en scola. Il regulativ communal per il survetsch dentari da scola vertent cuntegn sulettamein la suandonta determinaziun: "*Contribuziun dalla vischnaunca al survetsch dentari: 1/2 dils cuosts, denton maximalmein frs. 250.-- per affon e per onn*".

Sebasond sin art. 15 dall'ordinaziun cantunala numnada e tenor il contract che las vischnauncas dalla Cadi han signau avon treis onns cun dr. med. dent. Petra Tuor, han las vischnauncas d'indemnisar la dentista pils tractaments e d'incassar ils daners dils pertuccai. Il rendaquen succeda mintgamai per la fin digl onn da scola. Ella pratica vesa quei ora aschia, che la vischnaunca paga alla dentista da scola ils cuosts cumpleins per la controlla e pils tractaments. El medem mument tschenta l'administraziun communal a quen als geniturs ils cuosts per il tractament da lur affons cun mintgamai trer giu dil quen la cumpart communal da 50 %, maximalmein frs. 250.-- per affon ed onn. Quei quen san ils geniturs suttametter alla cassa da malsauns, la quala restituescha sia cumpart tenor las cundiziuns d'assicuranza individualas per mintga affon. Cunquei che las cassas da malsauns sebasan sin ils cuosts effectivs ch'ils geniturs han da pagar e buca sin la summa facturada dalla dentista, capeta ei savens, che la vischnaunca surpren cuosts che las cassas da malsauns havessen da pagar. Quella situaziun disfavoreivla per la vischnaunca duei tenor las objecziuns dil cussegl da vischnaunca vegnir eliminada.

## Nova reglamentaziun

Sebasond sin quellas consideraziuns ha la suprastanza communal revediu il regulativ per il survetsch dentari da scola. Cunquei che l'ordinaziun cantunala regla ils detagls, sa il regulativ communal serestrenscher sin entgins artechels da muntada generala. La part essenziala vegn reglada els artechels 5 entochen 8, nua che la repartiziun dils cuosts sco era igl incasso e la cumpart communal vegnan reglai.

Vid la cumpart che la vischnaunca surpren, dat ei neginas midadas (art. 8, al. 1). Perencunter vegn reglamentau da niev en art. 8, al. 2, ch'ils geniturs hagian - avon che tschentar alla vischnaunca la damonda per ina contribuziun - da tarmetter ils quens alla cassa da malsauns. La vischnaunca paga sia cumpart pér suenter che las cassas da malsauns han indemnisau lur cumpart.


Quella nova reglamentaziun caschuna lavur administrativa supplementara. Cun in sempel sistem da rendaquen (formular) sa quella denton vegnir reducida. Damai che la cumpart communal sereducescha cun il niev sistem da rendaquen, ei la lavur administrativa supplementara da responsar.


## Proposta

Sin fundament dallas consideraziuns precedentas propona la suprastanza communal al cussegl da vischnaunca

- d'approbar la revisiun totala dil regulativ per il survetsch dentari da scola.

Suprastanza communal Disentis/Mustér  
Il President: Il canzlist:

  
Dr. Dumeni Columberg

  
Andri Hendry

Disentis/Mustér, ils 9 d'october 2012

- Regulativ per il survetsch dentari da scola